



**Christliche Erklärung in Religions Sachen, so der
Hochwürdigst Fürst und Herr, Herr Gebhardt, Erwehltter und
Bestättigter zu Ertzbischoffen zu Cölln, dess Heiligen Reichs
durch Italien Ertz-Canzler und Churfürst, Hertzog zu
Westphalen und Engern etc. den 16. Januarii, dieses jetzt
lauffenden 83. Jars, in irer Churf. G. Ertzstift Cölln, öffentlich
publiciern, und verkünden lassen etc.**

<https://hdl.handle.net/1874/9179>

Christliche Erklärung in
Religions Sachen/ So der Hochwürdigst
Fürst vnd Herr/Herr Gebhardt / Erwehltter vnd Be-
stättigter zu Erzbischoffen zu Cöln / Des heyligen Reichs durch Italien Erk-
Cansler vnd Churfürst/Herzog zu Westphalen vnd Engern/2c. den 16. Ja-
nuarij/dieses jetztlauffenden 83. Jars/In irer Churf. B. Erkschafft
1 5 Cöln öffentlich publiciern vnd verkünden lassen/2c. 8 3.



Herr Gebhardt von Gottes Gnaden/Erwehltter vnd Bestättigter zu Erzbischoffen zu Cölln/ des Heyligen Römischen Reichs durch Italien Erzkantzler/ vnd Churfürst/ Herkog zu Westphalen vnd Engern / etc. Entbieten allen vnd jeden vnsers Erbstiffts zugethanen Landständen / Graffen / der Ritterschafft/ Stätten/vnd Vnterthanen/auch andern Angehörigen/vnser Gnade vnd alles Guts/ Vnd fügen euch sampt vñ sonder hiemit zuwissen: Dasz nach Annemung vnserer Erzbischofflichen vnd Churfürstlichen Regierung / darinn vns der Allmächtige durch ordentliche Wahlgesetz/wir jeder zeit/wie auch noch/vns verpflichtet erkennen haben/nicht allein die Wolfart vñ Auffnemen vnseres von Gott befohlenen Churfürstenthumbs vñ Erbstiffts/wie auch gemeinen Vaterlands Teutscher Nation / Sondern auch zu förderst die befürderung der Ehren Gottes/vor allen andern Sachen/vns mit Ernst lassen angelegen zu seyn. Wenn den newlicher zeit etliche auß vnserer Ritterschafft / vund andern von der Landschaft/in nit geringer Anzahl/ vns vndertheniglich vnd embfig angelangt/Auch durch Fürschritten etlicher ansehenlicher hoher Stände des heyiligen Reichs ersucht/ inen die öffentliche Predigt des heyiligen Euangelij/auch Vbung der Sacramenten / nach Aufweisung Gottes Worts/der Augspurgischē Confession/vñ deren Christlichen

lichen Erklärungen/ zugestatten vñ zu zulassen. Vnd wir
vns hier auff des ewigē unswandelbaren Willen Gottes/
Nemlich/ daß man seinen Son hören/ auch seines ernst-
lichen befelchs/ daß die Fürsten vnd Regenten der Welt
dem König der Ehren die Pforten öffnen / vnd in zu sich
eynziehen lassen sollen/ wir auch vnser s von Gott befoh-
lenen Ampts erinert/ vñ zu Gemüt geführt/ wie schwer-
lich/ ja ganz vnd gar nicht/ vnd am Jüngsten tag/ da wir
Gott dem Allmächtigen vnser s tragenden vnd von ihm
befohlenen Ampts Rechenschaft thun müssen / zu ver-
antworten stehen würde/ vnsern Vnterthanen den Weg
zur Seligkeit zu verschließen. Wir vns auch schuldig wis-
sen/ Gott/ der ein strenger Richter vnd ein verzehrendes
Feyer ist/ von herzen zu fürchten/ vnd seinem ernstlichen
Befelch zu gehorsamen vnd nachzusetzen: So haben wir
obgedachter vnser Ritterschafft vnd vnderthanen vnter-
thenige Bitt vnd flehenlichs Ansuchen/ als ein Christli-
che Oberkeit angesehen/ vnd ihnen ihr Anlangen lenger
nicht zu verweigern gewüßt. Demnach auff gehalten
Rath vnserer Herrn vñ Freunde/ Auch vergangene zeit-
liche vñ reiffe Consultation/ So thun wir menniglichen/
weß Standts vnd wesens die seyn / so vns vnd vnserm
Erkuffte zugethan vnd verwandt / nit allein die Christ-
liche Freyheit ires Gewissens/ Gottes Wort gemäß/ hie-
mit zulassen: Sondern bewilligen/ vergünstigen/ erlau-
ben vnd gestatten men auch solches hiemit/ vnd in Krafft

dieses vnser̄s offenen Aufschreibens/ Also vnd in der ge-
stalt/ daß keiner vnserer Vnderthanen vñ angehörigen/
er sey vns gleich mit oder one Mittel vnterworffen / von
vnsern Amptleut̄ē/ Befelchhabern / oder auch vnsern
Landsassen/ Lehenleuten/ vnd andern Vntergerichtbarn
Oberkeiten/ wie die Namen haben oder haben mögen/ in
Glaubens/ Gewissens/ vñ Religions sachen / so fern er
sich zu Gotts Wort/ vnd der Augspurgischen Confession
bekenet/ verfolget/ betrübt/ noch an seine Ehren/ Digni-
teten/ Leib/ Haab oder Gütern angefochten werden soll.
Wir erlauben/ lassen zu/ vnd gestatten auch hiemit allen
vnd jedē vnsern Prelatē / Graffen/ Herrn/ Lehenleuten/
Landsassen/ Stätten/ Kommunen/ Dörffern/ vnd allen
andern Gemeinden vnser̄s Churfürstenthums vñ Erz-
stifts/ daß sie mögen vñ macht haben sollen/ die öffentli-
che Predigt/ auch vbung vnd gebrauch der hochwürdigen
h. Sacramentē/ nach Inhalt Göttlicher Prophetischer
vnd Apostolischer Schrift / auch darauß gegründter
Augspurgischer Confession/ vñ deren Christlichen Erklä-
rungen/ anzustellen/ vnd ins Werck zurichten/ Vngehin-
dert vnserer Amptleut/ Befelchhaber/ vnd sonsten men-
niglichs/ Daben denn wir/ als ein Christliche Oberkeit/
alle vnd jedē/ so vns verwandt vnd zugethan/ mit Hülff
des Allmächtigen gedencen zu schützen/ zu schirmen vnd
handt zu haben. Verhoffen auch zu seiner Allmacht/ Er
werde vns in solchē vnserm Christlichen Vorhaben gnä-
diglich

diglich beystehen/ vnd seine Ehr/ auch allein seligmachen-
des Wort wider alle Pforten der Hellen vertheidigen vnd
erhalten. Daneben bezeugen wir hie mit vor Gott dem
Allmächtigen/ welcher die höchste Wahrheit/ vnd ein Er-
kündiger aller Herzen ist/ daß wir zu diesem Christlichen
Vorhaben nit durch Fürwitz/ Ehrgeitz/ oder etwas an-
ders getriebē werden/ noch hierinē vnsern eygnen Nutz/
Ehr/ Ruhm oder Pracht/ Sondern allein Christi vnser
Erlösers Ehr/ die Fortpflanzung seines heiligē Worts/
vnd die ewige Wolfart vnd Seligkeit vnserer von Gott
befohlenen Vnderthanen hierin suchen vñ zu befürdern
vorhaben. Auff daß auch niemand dafür achte/ daß wir
zu Zerrüttung geneigt / Sondern viel mehr Christliche
Ordnung in Kirchen vnd Schulen von Herzen gern se-
hen/ liebhaben/ vnd zu erhalten begeren: So sind wir be-
dacht/ mit Raht vnserer Landstände/ auch anderer vnse-
rer Herrn vnd Freunde/ vns zu ehester Nützlichkeit einer
Christlichen Ordnung/ welche in Kirchen vnd Schulen
vnserer Erbstiffts vnd Churfürstenthumbs soll gehalten
werden/ zu entschliessen. In mittels wollen wir jederman
niglich/ so sich zur Religion Augspurgischer Confession/
vnd derselben Gottes Wort gemäß erfolgte Christlichen
Erklärungē/ in vnserm Erbstifte zu bekennen bedacht/ sich
alles Christlichen Enffers vñ bescheidenheit zu gebrau-
chen/ gnädiglich erinnert vñd vermahnet haben. Mit
angehende dem ernstlichem Befelch/ daß niemandt den

andern der Religion halben anfechten/schmähen/schän-
den/lästern/ noch mit Worten oder Wercken beleidigen:
Sondern ein jeder bey vnd neben dem andern in gutem
friedlichem Wesen leben vnd bleiben solle. Ferrner/ Da-
mit vnserer selbst Personhalbē auff den Fall/wo wir vns/
nach schickung des Allmächtigen/in den Ehstandt zube-
geben vns entschliessen würden / niemandt vns beschül-
digen mögen/als ob wir in dem wider die Gebür einigen
Priuat Vorthail zu suchen / oder wider vnsern Erbstiftt
vnd Churfürstenthumb/vnsern Erben zu gutem/etwas
Unzimblichs vorzunemmen gemeynnt seyn: So thun wir
vns hiemit öffentlich/vñ bey der höchsten Warheit/wel-
che Gott der Allmächtige selber ist/bezeugen/Daß vnser
Will vnd Meynung keines wegs dahin gerichtet sey/vn-
sern Erbstiftt auff vnser Erben zubringen / oder sonst
darinnen einige verweißliche/vñ zu vnserm PriuatVor-
theil reichende Enderung vorzunemmen oder eynzufüh-
ren: Sondern erklären vns hiemit öffentlich / in Krafft
dieses vnseres Außschreibens/das nach vnserm tödlichen
Absterben/oder willkührlichem Abtretten/vnserm wür-
digen Thumb Capitel/seine freye Wahl gelassen werden/
vnd bevor stehen/Auch auff vorgedachte Fall alle vnd je-
de dieses vnseres Erbstiftts vnd Churfürstenthumbs Le-
henleut/Landsassen/Vnderthanen vnd Angehörige/biß
zu ordentlicher Erwehlung eines künfftigen Häupts/nie-
mands andern/es masse sich des gleichē an/ wer da wöl-
le/ denn

le/denn gedachtem Thumb Capitel/als irem Erbherren/
verpflichtet/verwandt vnd zugethan/gehorsam vnd ge-
wertig seyn: oder demselbigen ohne vorgehende ordentli-
che Wahl/ vnd vnseres würdigen Thumb Capitelz/ al-
tem Herkommen nach/ außdrückliche Erklärung/ wer
zum Successorn vnd Nachfolger erwahlet worden sey/
vor iren Herrn recognoscieren vnd erkennen sollen/ vnge-
hindert einiger Disposition/ Sakunge oder Ordnung/
so durch vns oder jemandz anders/ der sey wer er wölle/
auffgerichtet/ oder diser vnserer öffentlichē Erklärung zu-
wider für genommen werden möchte/ Denn wir solches
alles jetzt als den/ vnd denn als jetzt/ hiemit auffgehoben/
cassiert/ vernichtiget vnd annulliert haben wollen. Alles
in der höchsten vñ besten Form/ vñ wie solehs zum kräft-
tigsten vñnd beständigsten geschehen sol/ kan oder mag.
Wir auch vrbietig vnd willig seind/ vns hierüber mit vn-
serm würdigen Thumb Capittel vnd Landschafft fernner
gebürlichen zu vergleichen/ Vnd diese versprechung der-
massen zu versichern/ daß man sich einigen widerwertig-
gē vorhabens oder beginnens/ weder zu vns/ noch vnsern
Erben/ zu befahren haben solle. Hierauff befehlen vñnd
gebieten wir allen vnd jeden vnsern Landtrosten/ Ampt-
leuten/ Bögten/ Schultheissen/ Richtern/ Vograuen/
Kellnern/ Zöllern/ Bürgermeistern/ Bürgern/ Ge-
meinden/ vnd sonst allen andern Befelch habern/ Vnter-
thanen vnd Verwandten / vber diesem vnserm offenen
Edict/

Edict/Ausschreiben vnnnd Mandat/ernstlich zu halten/
dasselbige zu vollziehen/vnd menniglich dabey zu hand-
haben/auch niemandes darwider zu beschwerē/noch sol-
ches zu geschehen gestatten / Bey vermeydunge vnserer
Bagnade/ vnnnd verhütunge vnnachlässlicher Straff/
Denn solches ist vnser ernstlicher vñ endlicher Will vnd
Meynung. Dessen zu Brkunde haben wir diese vnser
Erklärung öffentlich in Druck außgehen/vnd mit Auff-
druckung vnser Insigels bekräftigen/ Auch allenthal-
ben in vnserm Erzkstift vnd Churfürstenthumb / damit
jederman davon Wissenschaft haben möge/ anschlagen
lassen. Geschehen in vnserer Statt Bonn / den sechze-
henden Januarij / Als man zehlet nach der Geburt vn-
sers lieben H E R R N vnnnd Seligmachers Jesu
Christi / tausendt / fünffhundert / achzig
vnnnd drey Jar.

